

**LIGJI NR. 06/L -039****PËR SHËRBIMIN GJEOLGJIK TË KOSOVËS****Kuvendi i Republikës së Kosovës;**

Në bazë të nenit 65 (1) të Kushtetutës së Republikës së Kosovës,

Miraton:

**LIGJ PËR SHËRBIMIN GJEOLGJIK TË KOSOVËS****Neni 1****Qëllimi**

Ky ligj përcakton kompetencat, detyrat dhe funksionet e Shërbimit Gjeologjik të Kosovës duke përfshirë veprimtarinë në fushën e shkencave gjeologjike në territorin e Republikës së Kosovës

**Neni 2****Fushëveprimi**

Dispozitat e këtij ligji zbatohen për të gjitha aktivitetet e kryera nga Shërbimi Gjeologjik i Kosovës, që përfshinë hulumtimet, kushtet dhe mënyrën e kryerjes së hulumtimeve gjeologjike, programimin dhe organizimin e hulumtimeve gjeologjike me interes për Republikën e Kosovës.

**Neni 3****Përkufizimet**

1. Termet e përdorura në këtë ligj kanë këtë kuptim:

1.1. **Ministria** –Ministria përgjegjëse për sektorin mineralar;

1.2. **Ministër** - Ministri përkatës për sektorin mineralar.

1.3. **Shërbimi Gjeologjik i Kosovës SHGJK** – organ i pavarur në kuadër të Ministrisë, i cili funksion si organ këshillimor, teknik dhe shkencor i shtetit, i cili kryen veprimtari në fushën e shkencave gjeologjike në territorin e Republikës së Kosovës.

1.4. **Muzeu** -Muzeu Shtetëror i Kristaleve dhe Mineraleve “Trepça.”

1.5. **Hulumtimet gjeologjike** - janë tërësi e aktiviteteve dhe proceseve që bëhen me qëllim të zbulimit dhe marrjes së informacioneve të duhura mbi: ndërtimin gjeologjik, gjenezën, karakteristikat cilësore dhe sasiore të mineraleve dhe resurseve tjera gjeologjike, gjeotermale, hidrogeologjike, gjeologo-inxhinjerie-gjeoteknike, karakteristikat gjeodinamike të mjedisit gjeologjik si rreziqet gjeologjike dhe rreziqet në kuptimin e aktivizimit të proceseve të rrezikshme gjeologjike, planifikimit hapësinor, mbrojtjen dhe avancimin e mjedisit.

**1.6. Punimet hulumtuese gjeologjike** - përfshinë të gjitha llojet e hulumtimeve, studimeve dhe testeve fushore, laboratorike dhe kabinetike që realizohen me qëllim të hulumtimit dhe zbulimit të mineraleve dhe resurseve tjera gjeologjike, ujërave nëntokësore, energjisë gjeotermale, si dhe hulumtimet gjeologjike të mjedisit;

**1.7. Rreziku gjeologjik** - është mundësia e aktivizimit të një procesi potencialisht të rrezikshëm gjeologjik (rrëshqitjet e tokës, shembjet, tërmetet, përmytjet dhe të ngjashme) në një zonë të caktuar dhe në një periudhë të caktuar kohore, e cila përfshin madhësinë e procesit të aktivizuar (sipërfaqja e terrenit e përfshirë në rrëshqitje, fundosje, vëllimi i masave në lëvizje, karakteri i ndotjes së mjedisit gjeologjik, fuqia e tërmetit dhe të ngjashme).

**1.8. Mbrojtja e mjedisit** – nënkupton mbrojtjen dhe prezantimin e vlerave natyrore (fenomeneve gjeologjike, gjeomorfologjike e karakteristikave të zhvillimit historik të Korës së Tokës dhe formave reprezentative të këtyre fenomeneve), mbrojtjen nga proceset e dëmshme natyrore (tërmete, rrëshqitjeve, erozionit, përmytjeve etj.) dhe nga veprimet negative teknogjene (ndotja e dherave gjatë hulumtimit dhe shfrytëzimit të mineraleve të dobishme, ndotja e ujërave nëntokësore, çrregullimi artificial i stabilitetit të dherave, ndotjes së ajrit dhe rrezikimi i vlerave të mbrojtura të natyrës).

2. Tërmet tjera të përdorura në këtë ligj të cilat nuk janë të përfshira në këto përkufizime, kanë kuptimin e termeve të përdorura në legjislacionin në fuqi për minierat dhe mineralet.

#### **Neni 4**

#### **Shërbimi Gjeologjik i Kosovës**

1. Shërbimi Gjeologjik i Kosovës është organ i pavarur në kuadër të Ministrisë.
2. Selia e SHGJK-së është në Prishtinë.

#### **Neni 5**

#### **Detyrat dhe përgjegjësitë e Shërbimit Gjeologjik të Kosovës**

1. Detyrat dhe përgjegjësitë e Shërbimit Gjeologjik të Kosovës, janë si në vijim:
  - 1.1. hulumtime themelore gjeologjike, hulumtime aplikative gjeologjike të rëndësishme për Republikën e Kosovës;
  - 1.2. studime gjeologjike sistematike bazë në tokë, në liqene, në territorin e Republikës së Kosovës, nëpërmjet hartografimeve komplekse të shkallëve të ndryshme;
  - 1.3. studime gjeokimike të territorit të Kosovës dhe përpilimin e hartave gjeologjike në shkallë të ndryshme, plotësimin e hartave ekzistuese me informacione të reja për territorin e Republikës së Kosovës;
  - 1.4. studimet të thelluara shkencore për gjeologjinë dhe metalogjinë në territorin e Republikës së Kosovës;
  - 1.5. studime dhe hulumtime gjeofizike të çdo shkalle me qëllim të studimit të korës së tokës në ose në afërsi të sipërfaqes së tokës, formacionet të ndikuara nga shpërndarja

horizontale dhe vertikale të brendshme e vetive fizike në fushat e ndryshme gjeologjike;

1.6. studime për promovim të perspektivës së mineraleve të dobishme dhe vlerësimin ekonomik të tyre;

1.7. studime dhe hulumtime hidrogjeologjike, ujërave nëntokësore, ujërave minerale dhe gjeotermal;

1.8. hulumtime dhe studime gjeologo-inxhinierike dhe të gjeorrezizqeve;

1.9. studimet gjeologjike komplekse për gjeomjedisin në funksion të planifikimit të territorit;

1.10. studime dhe vlerësime të gjeomonumenteve;

1.11. hulumtime dhe vlerësime të mineraleve metalore, jo metalore, energjetike, hidrokarbureve, mineraleve industriale, gurët e çmuar dhe gjysmë të çmuar;

1.12. hulumtime dhe studime të përgjithshme paleontologjike, stratigrafike, sedimentologjike, petrografike, mineralogjike, kimike, gjeomorfologjike, gjeodinamike, gjeologjiko strukturore dhe gjeostatistike;

1.13. kryen edhe veprimtari tjera me interes për Republikën e Kosovës, si harta gjeologjike në shkallë të ndryshme, harta gjeologjike tematike (metalogjenike, mineralmbajtëse, gjeokimike, hidrogjeologjike, gjeologo-inxhinierike, strukturo-tektonike, sizmike, gjeomonumenteve, gjeoekologjike, përfshirë edhe përgatitjen e bazës gjeologjike për nevojat e planifikimit hapësinor, hulumtime dhe monitorimin e rrëshqitjeve të tokës, përgatitjen e hartave gjeologjike të rrezikut, hulumtimet regjionale gjeofizike, analiza dhe hulumtime laboratorike në fushat e mineralogjisë, petrografisë, sedimentologjisë, paleontologjisë, kimike, analiza gjeomekanike;

1.14. kryen studime dhe punime zhvillimore, të hulumtimeve gjeo-shkencore dhe projekte ndërkombëtare në fushën e gjeologjisë, studimin e ujërave nëntokësore në bazë të programeve të veçanta, mbledhjen, përditësimin dhe ruajtjen e të dhënave dhe dokumentacionit teknik me interes për sistemin e bazës së të dhënave gjeologjike të Republikës së Kosovës;

1.15. kryen shërbime të kualifikuara, ekspertiza, këshillime, monitorime për hulumtime gjeologjike, përgatit projekte për institucione të tjera, publike për hulumtime gjeologo-inxhinierike dhe gjeoteknike, si dhe punë tjera në bazë të këtij ligji;

1.16. krijon, përditëson dhe mirëmban bazën e të dhënave gjeologjike, e cila duhet të jetë në dispozicion të Qeverisë si dhe subjekteve të tjera të interesuara për hulumtime gjeologjike;

1.17. bashkëpunon me institucionet e tjera relevante në hartimin e Strategjisë Minerare;

1.18. ofron analiza objektive dhe të paanshme për autoritetet publike dhe organizatat e sektorit privat brenda fushës së ekspertizës së SHGJK-së;

1.19. promovon kristalet e mineraleve, gurët e çmuar dhe gjysmë të çmuar të Muzeut Shtetëror të Kristaleve dhe Mineraleve “Trepça”;

1.20. krijon, mirëmban, pasuron dhe zgjeron bazën shtetërore e të dhënave për kristalet dhe mineralet, fosilet, gurët e çmuar dhe gjysmë të çmuar;

1.21. hulumtime dhe studime mbi zvogëlimin e ndotjes së mjedisit nga aktivitetet minerare;

1.22. kryen shërbime të kualifikuara, si ekspertiza, analiza, këshillime, monitorime për qëllime dhe fushën e përcaktuar me këtë ligj;

1.23. menaxhon me rrjetin Sizmologjik të Kosovës, monitoron aktivitetin sizmik të vendit dhe rajonit, bën studime makro dhe mikro sizmologjike sipas kodeve të aplikuara në Kosovë;

1.24. harton programe, projekte hulumtuese për institucione të tjera, publike dhe private, brenda dhe jashtë vendit, si dhe me shoqata, fondacione për qëllime sipas fushës së përcaktuar me këtë ligj;

1.25. menaxhon me laboratorin dhe kryen analiza profesionale laboratorike për hulumtime dhe studime gjeologjike dhe bashkëpunon ngushtë me Fakultetin e Gjeoshkencave në përdorimin e Laboratorit për qëllime studimi;

1.26. studime dhe hulumtime për palën e tretë;

1.27. siguron Kadastrën Minerare dhe GIS-it të KPMM-së të dhëna të azhuruara nga baza shtetërore e të dhënave gjeologjike, arkiva gjeologjike dhe të dhëna tjera gjeologjike;

1.28. krijon bazën e të dhënave gjeologjike, bilanceve të rezervave të mineraleve të dobishme, rezervave të ujërave nëntokësore, rreziqeve gjeologjike dhe vënia në dispozicion të institucioneve publike dhe private;

1.29. bashkëpunon me KPMM dhe autoritetet tjera publike sipas nevojës për ushtrimin e funksioneve të Shërbimit Gjeologjik të Kosovës;

1.30. bashkëpunon me institucione të tjera vendore dhe ndërkombëtare, në pajtim me legjislacionin në fuqi si dhe ofron informacione gjeoshkencore institucioneve publike në Republikën e Kosovës;

1.31. i paraqet ministrit raport vjetor për veprimtarinë hulumtuese të zhvilluar, raport ky i cili pas aprovimit bëhet publik.

2. Shërbimi Gjeologjik i Kosovës bazuar në detyrat dhe përgjegjësitë e parapara sipas këtij neni, nuk i nënshtrohet procedurave ligjore të parapara sipas ligjeve në fuqi për marrjen e lejes dhe licencës për hulumtim.

## **Neni 6**

### **Stema**

Shërbimi Gjeologjik i Kosovës e ka stemën, e cila propozohet nga Drejtori i Përgjithshëm dhe miratohet nga Ministri.

## **Neni 7**

### **Organizimi dhe struktura**

1. Organizimi struktura dhe funksionalizimi i brendshëm i Shërbimit Gjeologjik të Kosovës, rregullohet me Rregullore për organizimin e brendshëm dhe sistematizimin e vendeve të punës për Shërbimin Gjeologjik të Kosovës.
2. Personeli i punësuar në Shërbimit Gjeologjik të Kosovës, e ka statusin e nëpunësit civil.

## **Neni 8**

### **Udhëheqja**

Shërbimi Gjeologjik i Kosovës udhëhiqet nga Drejtori i Përgjithshëm i cili për menaxhimin dhe administrimin e SHGJK-së, i përgjigjet drejtpërdrejt Ministrit.

## **Neni 9**

### **Drejtori i Përgjithshëm**

Drejtori i Përgjithshëm emërohet dhe shkarkohet në pajtim me legjislacionin në fuqi për pozitat të larta drejtuese në shërbimin civil të Republikës së Kosovës.

## **Neni 10**

### **Detyrat dhe përgjegjësit e Drejtorit të Përgjithshëm**

1. Drejtori i Përgjithshëm ka këto detyra dhe përgjegjësi kryesore:
  - 1.1. Organizon dhe udhëheqë veprimtarinë e përgjithshme të Shërbimit Gjeologjik të Kosovës;
  - 1.2. Programon objektivat e Shërbimit Gjeologjik të Kosovës në zbatim të Programit të Ministrisë dhe koordinon të gjitha projektet për hulumtime gjeologjike;
  - 1.3. Përgatit plan-programin vjetor të punëve të Shërbimit Gjeologjik të Kosovës;
  - 1.4. Mbikëqyrë veprimtarinë e punës së Shërbimit Gjeologjik të Kosovës, si dhe analizon realizimin e detyrave të planeve të punës hulumtuese;
  - 1.5. Mbështetë dhe bashkëpunon me Ministrinë dhe institucionet tjera në hartimin e Strategjisë Minerare;
  - 1.6. vlerësimin e hollësishëm të shpenzimeve që pritet t'i bart gjatë vitit;

1.7. vlerësimin e nevojave për burime adekuate njerëzore dhe nevojave financiare të mjaftueshme për funksionim;

1.8. Siguron udhëzime të përshtatshme, të sakta, të paanshme dhe këshilla profesionale për Ministrinë;

1.9. Përgatit dhe i dorëzon Ministrit raport të hollësishëm vjetor lidhur me realizimin e planit dhe veprimtarinë e Shërbimit Gjeologjik të Kosovës, më së largu deri në përfundim të tremujorit të parë të vitit vijues kalendarik;

1.10. Përfaqëson Shërbimit Gjeologjik të Kosovës në marrëdhëniet me palën e tretë.

### **Neni 11**

#### **Buxheti**

1. Drejtori i Përgjithshëm përgatit buxhetin e SHGJK-së, të cilin ia përcjell ministrit për shqyrtim dhe procedim të mëtutjeshëm në përputhshmëri me procedurat e parapara me legjislacionin në fuqi.

2. Drejtori i Përgjithshëm është përgjegjës për menaxhimin eficient të buxhetit të Shërbimit Gjeologjik të Kosovës, në pajtim me ligjin dhe me rregullat e brendshme buxhetore të Ministrisë.

3. Të hyrat buxhetore që krijohen nga veprimtaria e Shërbimit Gjeologjik të Kosovës, derdhen në Buxhetin e Republikës së Kosovës.

4. Fondet e dhëna nga donatorët që janë të dedikuara për këto veprimtari derdhen në Buxhetin e Republikës së Kosovës. Shfrytëzimi i fondeve nga donacionet do të bëhet në përputhje me Ligjin për menaxhimin e financave publike dhe përgjegjësisë, kontrollit të menaxhimit të financave dhe rregullativave të thesarit.

5. Hulumtimet themelore dhe ato të detajuara gjeologjike financohen nga:

5.1. Buxheti i Kosovës;

5.2. Ndërmarrjet publike;

5.3. Donatorët; dhe,

5.4. Persona tjerë fizik e juridik të regjistruar, vendas apo të huaj.

### **Neni 12**

#### **Marrja e të dhënave dhe Informacioneve**

1. Shërbimi Gjeologjik i Kosovës ka të drejtë dhe detyrë të grumbullojë, të ruajë në Arkivin e SHGJK-së të gjithë informacionin dhe dokumentacionin e përfituar deri tani dhe atë që do të përfitohet në të ardhmen në fushën e gjeologjisë bazë, të mineralogjisë, të gjeofizikës, gjeokimisë, stratigrafisë, hidrogjeologjisë, gjeologjisë inxhinierike, sizmologjisë, kampionaturën, provat dublikate të tyre, të sistemojë, ruajë, përpunojë këto informacione dhe t'i përdorë sipas rregullave që përcaktohen sipas paragrafit 5 të këtij neni.

2. Arkivi i gjeologjisë do të funksionoj në kuadër të Shërbimit Gjeologjik të Kosovës.
3. Organizimi, funksionimi, sistemim dhe mirëmbajeteja e arkivit bëhet në harmoni me Ligjin mbi Arkivat.
4. Obligohen të gjithë personat fizik e juridik të bashkpusojnë me arkivin e Shërbimit Gjeologjik të Kosovës, dhe në rast se në një mënyre apo në mënyre tjeter kanë arritur deri të dokumentacioni tekstual, grafik apo faktik, që ato dokumente të dorëzojnë në Arkivin e Shërbimit Gjeologjik të Kosovës, në të kundërtën bëjnë veper penale për mshefje të dokumentacionit që konsiderohet me interes për Kosovën.
5. Forma e organizimit, përdorimit dhe shfrytëzimit të materialit Arkivor të Shërbimit Gjeologjik të Kosovës përcaktohen me akt nënligjor, të nxjerrë nga Ministria.

### **Neni 13**

#### **Kryerja e shërbimeve për palën e tretë**

1. Shërbimi Gjeologjik i Kosovës ofron shërbime me pagesë për palën e tretë, bazuar në përgjegjësitë e përcaktuara sipas nenit 5 të këtij ligji.
2. Tarifat e shërbimit me pagesë për palën e tretë, përcaktohen me akt nënligjor, të nxjerrë nga Ministria.
3. Institucionet shtetërore të Republikës së Kosovës, qoftë ato qëndore apo lokale, obligohen që të marrin shërbim nga Shërbimi Gjeologjik i Kosovës, përveç, nëse kjo e fundit nuk e ofron një shërbim të tillë.
4. Për studime dhe projekte që kryhen jashtë territorit të Republikës së Kosovës merret miratimi nga Ministri.

### **Neni 14**

#### **Muzeu Shtetëror i Kristaleve dhe Mineraleve – “Trepça”**

1. Muzeu Shtetëror i Kristaleve dhe Mineraleve “Trepça” vepron në kuadër të SHGJK-së.
2. Veprimtaria e muzeut përfshinë: mbledhjen, ekspozimin, ruajtjen, analizimin dhe përpunimin në mënyrë profesionale dhe shkencore, sistematizimin në grupe, mbrojtjen e përhershme të mineraleve/kristaleve dhe dokumentacionit të muzeut.
3. Ministria nxjerrë Udhëzim Administrativ për mënyrën e mbledhjes, koleksionimit, ruajtjes dhe mbrojtjes së mineraleve me strukturë kristalore, numrin dhe llojin e mineraleve të mbrojtura, në Muzeun Shtetëror të Kristaleve dhe Mineraleve “Trepça”.
4. Ministria nxjerrë Udhëzim Administrativ për mënyrën e blerjes, dhurimit, trashëgimit, ndërrimit, ekspozimit të kristaleve, dhe mineraleve si dhe mënyrën e pajisjes me dokumentacion përkatës për koleksionuesit e mineraleve dhe kristaleve.

### **Neni 15**

#### **Bashkëpunimi me institucione të tjera**

1.Shërbimit Gjeologjik të Kosovës bashkëpunon me institucione të tjera vendore dhe ndërkombëtare, në pajtim me legjislacionin në fuqi si dhe ofron informacione gjeoshkencore institucioneve publike në Republikën e Kosovës.

2.Shërbimi Gjeologjik i Kosovës bashkëpunon ngushtë me Fakultetin e Gjeoshkencave në përdorimin e Laboratorit për qëllime studimore shkencore.

### **Neni 16**

#### **Shërbimet Sizmologjike**

1. Shërbimi Gjeologjik i Kosovës ndër të tjera ka përgjegjësitë edhe në vijim:

1.1.monitoron te gjitha aktivitetet e ngjarjeve sizmike të vendit, rajonit dhe më gjerë,

1.2.kryen analizimin të dukurive sizmike,

1.3.mbledhë, përpunon të dhënat mbi fenomenet sizmike, sizmotektonike të manifestuara në truall, ndërtesa dhe objekte tjera.

1.4.kryen studime të inxhinierisë së tërmeteve lidhur me problemet e kodifikimit të parametrave të projektimit antisizmik në nivel të Kosovës, cenimin e riskut sizmik për qendrat të banuara.

1.5. kryen përpilimin e hartave të rrezikut sizmik me periudha kthyes.

1.6. kryen studime dhe mikrozonime të veçanta të rrezikut sizmik në nivel kombëtar, lokal dhe të shesheve të ndërtimit të objekteve të rëndësisë së veçantë.

2. SHGJK obligohet të njofton në kohë reale në mënyrë urgjencë organet kompetente shtetërore, opinionin publik, në rast se brenda territorit të Kosovës ndodhin tërmete me Magnitudë më të madhe se  $\geq 3.5$  të shkallës së Rihterit, me të dhënat pas ndodhjes së tërmetit dhe vlerësimin të dëmeve sipas kategorive të përdorshmërisë së objekteve nga rreziku sizmik për qendrat e goditura nga tërmeti.

3. Ministria nxjerr Udhëzim Administrativ për mikrozonime dhe studime të posaçme të rrezikut sizmik, në nivel kombëtar, lokal dhe të shesheve të ndërtimit të objekteve të rëndësisë së veçantë, sipas paragrafit 1.5 , 1.22. dhe 1.23 të nenit 5 të këtij ligji.

### **Neni 17**

#### **Mbikëqyrja**

Mbikëqyrja e zbatimit të këtij ligji si dhe akteve të tjera në zbatim të këtij ligji, kryhen nga Inspektorati i Minierave i cili vepron në kuadër të Komisionit të Pavarur për Miniera dhe Minerale.



**Neni 18**  
**Aktet nënligjore**

1. Ministria për zbatimin e këtij ligji, brenda një (1) viti, nga dita e hyrjes në fuqi të këtij ligji, nxjerr:

1.1. Rregullore për organizimin e brendshëm dhe sistematizimin e vendeve të punës për Shërbimin Gjeologjik të Kosovës;

1.2. Udhëzim Administrativ për formën e organizimit dhe përdorimit dhe shfrytëzimit të materialit arkivor të shërbimit gjeologjik;

1.3. Udhëzimin Administrativ për përcaktimin e tarifave të shërbimit me palën e tretë;

1.4. Udhëzim Administrativ për mënyrën e mbledhjes, koleksionimit, ruajtjes dhe mbrojtjes së mineraleve me strukturë kristalore, numrin dhe llojin e mineraleve të mbrojtura, në Muzeun Shtetëror të Kristaleve dhe Mineraleve "Trepça";

1.5. Udhëzim Administrativ për mënyrën e blerjes, dhurimit, trashëgimit, ndërrimit, ekspozimit të kristaleve, dhe mineraleve si dhe mënyrën e pajisjes me dokumentacion përkatës për koleksionuesit e mineraleve dhe kristaleve.

1.6. Udhëzim Administrativ për mikrozonime dhe studime të posaçme të rrezikut sizmik.

**Neni 19**  
**Shfuqizimi**

Me hyrjen në fuqi të këtij ligji shfuqizohet Ligji Nr.04/L-232 për Shërbimin Gjeologjik të Kosovës.

**Neni 20**  
**Hyrja në fuqi**

Ky ligj hynë në fuqi pesëmbëdhjetë (15) ditë pas publikimit në Gazetën Zyrtare të Republikës së Kosovës.

**Ligji Nr. 06/L -039**  
**30 mars 2018**

**Shpallur me dekretin Nr. DL-005-2018, datë 17.04.2018 nga Presidenti i Republikës së Kosovës Hashim Thaçi**